



**Broj: 01-77/12**  
**Vareš, 29.03. 2012. godine**

Na osnovu člana 13. stav 2. alineja 12. Zakona o principima lokalne samouprave u Federaciji Bosne i Hercegovine ("Službene novine F BiH", br. 49/06) i člana 22. tačka 14. Statuta Općine Vareš, br. 01-25/09 od 29.01. 2009. godine i 01-15/12 od 30.01. 2012. godine, Općinsko vijeće Vareš, na 37. sjednici održanoj dana 29.03. 2012. godine, d o n o s i

## **O D L U K U**

### **o općinskim priznanjima i postupku njihove dodjele**

#### **I OPĆE ODREDBE**

##### **Član 1.**

Ovom odlukom utvrđuju se vrste općinskih priznanja Općine Vareš, uslovi za njihovu dodjelu i postupak dodjele priznanja.

##### **Član 2.**

Općinska priznanja Općine Vareš (u daljem tekstu: priznanja) mogu se dodjeljivati fizičkim licima (u daljem tekstu: pojedinci) i privrednim društvima, ustanovama, mjesnim zajednicama, udruženjima građana, drugim lokalnim zajednicama i drugim pravnim licima (u daljem tekstu: pravna lica) kao izraz javne zahvalnosti za naročita postignuća i doprinos od posebnog značaja za razvoj i ugled općine Vareš.

Priznanja se ne dodjeljuju izabranim i drugim zvaničnicima Bosne i Hercegovine, Federacije Bosne i Hercegovine, Zeničko-dobojskog kantona i Općine Vareš za vrijeme trajanja njihovog mandata, te direktorima i članovima organa upravljanja javnih preduzeća i ustanova čiji je osnivač Općina Vareš.

#### **II VRSTE PRIZNANJA**

##### **Član 3.**

Priznanja su:

- Plaketa s grbom Općine Vareš,
- Plaketa Općine Vareš za životno djelo,
- Povelja o proglašenju počasnim građaninom/građankom općine Vareš,
- Zahvalnica Općine Vareš.

Redoslijed priznanja iz prethodnog stava predstavlja i visinu njihovog ranga.

Uz Plaketu s grbom Općine Vareš dodjeljuje se i novčana nagrada pojedincima i pravnim licima.

Profitabilnim pravnim licima se uz priznanje neće dodjeljivati novčana nagrada.  
Uz Plaketu Općine Vareš za životno djelo dodjeljuje se i novčana nagrada.  
Visinu novčanih nagrada iz stava 3. i 5. ovog člana utvrđuje Komisija za statutarna pitanja i propise (u daljem tekstu: Komisija).

#### **Član 4.**

U jednoj kalendarskoj godini istom pojedincu ili pravnom licu može se dodijeliti samo jedno priznanje.

Priznanja iz člana 3. stav 1. ove odluke ne mogu se dodijeliti pojedincima koji su krivično kažnjavani ili protiv kojih se vodi krivični postupak.

### **1. Plaketa s grbom Općine Vareš**

#### **Član 5.**

Plaketa s grbom Općine Vareš je najviše priznanje, koje se može dodijeliti zaslužnim pojedincima i pravnim licima, i to:

- za izvanredne uspjehe i izuzetna postignuća u radu ili poslovanju,
- za razvoj i unapređenje kvaliteta življenja i očuvanja okoliša na području općine Vareš,
- za razvoj i promicanje demokratskih principa i ljudskih prava i sloboda,
- za promicanje ugleda općine Vareš u zemlji i inostranstvu,
- prilikom godišnjica pravnih lica.

Plaketa s grbom Općine Vareš može se dodijeliti i partnerskim općinama, međunarodnim organizacijama i organizacijama iz drugih država.

Jedna Plaketa s grbom Općine Vareš dodjeljuje se svake druge godine.

### **2. Plaketa Općine Vareš za životno djelo**

#### **Član 6.**

Plaketa Općine Vareš za životno djelo može se dodijeliti pojedincima koji su u svom radu i djelovanju postigli izuzetne rezultate od opće društvene vrijednosti ili koji su značajno doprinijeli razvoju i afirmaciji općine Vareš na privrednom, naučnom, kulturnom, sportskom, humanitarnom ili drugom planu.

Plaketa Općine Vareš za životno djelo može se dodijeliti i grupi pojedinaca, ako je određeno ostvarenje odnosno postignuće rezultat njihovog zajedničkog rada.

U slučaju iz prethodnog stava, svakom pojedincu pripada srazmjerni dio novčane nagrade.

Pod životnim djelom u smislu ove odluke podrazumijeva se cjelovito djelo ili opus koji je pojedinac ostvario tokom svog radnog vijeka ili koje predstavlja izuzetno vrijedan rezultat.

Plaketa Općine Vareš za životno djelo dodjeljuje se svake druge godine pojedincu ili grupi pojedinaca kojima ovo priznanje ranije nije dodjeljivano.

### **3. Povelja o proglašenju počasnim građaninom/građankom općine Vareš**

#### **Član 7.**

Povelja o proglašenju počasnim građaninom/građankom Općine Vareš može se dodijeliti državljaninu Bosne i Hercegovine ili stranom državljaninu koji je svojim zalaganjem doprinio afirmaciji i dobrobiti općine Vareš ili razvoju i promicanju demokratskih principa i zaštiti ljudskih prava i sloboda.

Počasnim građaninom/građankom Općine Vareš ne može biti proglašen pojedinac koji ima prebivalište na području općine Vareš.

Počasni građanin/građanka ne stiče posebna prava odnosno obaveze.

### **Član 8.**

Ako se pojedinac koji je proglašen počasnim građaninom/građankom Općine Vareš pokaže nedostojnim takve počasti, Općinsko vijeće Vareš može opozvati dodijeljeno priznanje.

## **4. Zahvalnica Općine Vareš**

### **Član 9.**

Zahvalnica Općine Vareš može se dodijeliti pojedincima i pravnim licima za različite oblike pomoći pružene općini Vareš ili njenom stanovništvu.

Zahvalnicu Općine Vareš dodjeljuje Općinski načelnik.

Dodjela Zahvalnice Općine Vareš ne podliježe proceduri za predlaganje i dodjelu ostalih priznanja.

Godišnje je moguće dodijeliti najviše pet zahvalnica Općine Vareš.

O zahvalnicama Općine Vareš dodijeljenim tokom kalendarske godine, Općinski načelnik izvještava Općinsko vijeće Vareš na prvoj sjednici u novoj kalendarskoj godini.

### **Član 10.**

Priznanja se pojedincima dodjeljuju za života, a Plaketa s grbom Općine Vareš i Plaketa Općine Vareš za životno djelo izuzetno se mogu dodijeliti i posmrtno, ali tek nakon što proteknu tri godine od smrti pojedinca kojeg se želi kandidovati za dodjelu priznanja.

Kao kandidati za posmrtno dodjeljivanje priznanja mogu se predlagati pojedinci umrli nakon 01. januara 2002. godine.

Posmrtno dodijeljena priznanja ne ulaze u broj priznanja koja se mogu dodijeliti prema članu 5. stav 3. i članu 6. stav 5. ove odluke.

Posmrtno dodijeljena priznanja ne prati novčana nagrada.

## **III KRITERIJI ZA DODJELU PRIZNANJA**

### **Član 11.**

Kriteriji za dodjelu Plakete s grbom Općine Vareš i Plakete Općine Vareš za životno djelo su:

a) za pojedince:

- postizanje značajnih rezultata u oblasti nauke, obrazovanja, zdravstva, socijalne zaštite, kulture, sporta, amaterskog stvaralaštva i drugih društvenih djelatnosti ili najboljih rezultata u teorijskom i praktičnom radu na pojedinom području javnog djelovanja,
- doprinošenje unapređenju radnih procesa kreativnim radom ili inovacijama,
- dobivanje međunarodnih priznanja za vlastite inovacije,
- objavljivanje, prikazivanje, izlaganje, izvođenje ili prezentovanje na neki drugi način vlastitih ostvarenja značajnih za širu zajednicu,
- doprinošenje afirmaciji općine Vareš sportskim, kulturnim i drugim angažmanom i rezultatima,
- požrtvovno učestvovanje u spašavanju života i materijalnih dobara prilikom elementarnih nepogoda,
- ugled i visoke moralne vrijednosti.

b) za pravna lica:

- upošljavanje većeg broja radnika,
- ostvarenje značajne dobiti u poslovanju,
- vršenje znatnijih ulaganja u proširenje proizvodnih i drugih kapaciteta,
- davanje izuzetnog doprinosa u otklanjanju posljedica elementarnih nepogoda na području općine Vareš,

- postizanje poslovnih uspjeha na nivou međunarodnih standarda,
- najmanje pet godina postojanja i kontinuiranog djelovanja,
- renome uzornog pravnog lica.

#### **Član 12.**

Povelja o proglašenju počasnim građaninom/građankom Općine Vareš može se dodijeliti pojedincima iz Bosne i Hercegovine ili inostranstva (državnicima ili zvaničnicima drugih država, članovima međunarodnih organizacija odnosno organizacija drugih država ili njihovih organa) koji su posebno zaslužni za:

- jačanje ugleda Općine Vareš u zemlji i inostranstvu,
- razvoj općine Vareš ili njenih pojedinih javnih djelatnosti,
- promicanje vrijednosti demokratskog društva,
- njegovanje tradicije.

#### **Član 13.**

Zahvalnica Općine Vareš može se dodijeliti pojedincima i pravnim licima za donacije i slične aktivnosti koje svojim obimom ili vrijednošću prevazilaze uobičajene okvire, kao i za uspješnu saradnju i za doprinos razvoju i ugledu općine Vareš.

### **IV POSTUPAK DODJELE PRIZNANJA**

#### **Član 14.**

Postupak za dodjelu priznanja iz člana 3. stav 1. alineje 1.–3. ove odluke pokreće Komisija iz člana 3. stav 6. ove odluke raspisivanjem javnog poziva za dostavu prijedloga, koji objavljuje u lokalnim sredstvima informisanja i na općinskoj web stranici najkasnije do kraja maja tekuće godine.

Tekst javnog poziva sadrži uslove za dodjelu priznanja, dokumentaciju koju je potrebno priložiti i rokove za podnošenje prijedloga.

Pravo podnošenja prijedloga za dodjelu priznanja iz stava 1. ovog člana imaju građani, političke stranke, vjerske zajednice, udruženja građana, savjeti mjesnih zajednica, privredna društva, naučne, kulturne, obrazovne, sportske i druge institucije i javne ustanove sa sjedištem na području općine Vareš, vijećnici Općinskog vijeća Vareš i Općinski načelnik.

#### **Član 15.**

Prijedlog za dodjelu priznanja treba sadržavati:

- ime, prezime i adresu pojedinca, odnosno naziv i adresu pravnog lica koji se predlažu za dodjelu priznanja,
- naziv priznanja za koje se prijedlog podnosi,
- obrazloženje prijedloga za dodjelu priznanja.

Uz prijedlog predlagač je dužan priložiti odgovarajuću dokumentaciju (objavljeni radovi, analize, prikazi, stručne kritike i ocjene, takmičarski rezultati i sl.) kojom se potvrđuju navodi iz prijedloga.

Komisija neće uzeti u razmatranje prijedloge koji nisu podneseni u skladu sa odredbama ove odluke.

#### **Član 16.**

Komisija može, uz saglasnost podnosioca prijedloga, promijeniti vrstu priznanja za koje se kandidat predlaže.

Komisija utvrđuje prijedlog odluke za dodjelu priznanja pojedincima i pravnim licima i dostavlja je Općinskom vijeću Vareš na odlučivanje.

Komisija može, uz odgovarajuće obrazloženje, predložiti Općinskom vijeću Vareš da se neko od priznanja ne dodijeli.

#### **Član 17.**

Priznanja iz člana 3. stav 1. alineje 1.–3. ove odluke dodjeljuju se na svečanoj sjednici Općinskog vijeća Vareš povodom 16. augusta, Dana općine Vareš.

Odluka o dodjeli priznanja objavljuje se u Informativnom biltenu općine Vareš i na općinskoj oglasnoj tabli.

### **V ZAVRŠNE ODREDBE**

#### **Član 18.**

Prilikom provođenja ove odluke Komisija će raditi i odlučivati u skladu sa Poslovníkom o radu Općinskog vijeća Vareš.

#### **Član 19.**

Izgled, oblik i tekst priznanja iz člana 3. ove odluke utvrđuje Komisija.

#### **Član 20.**

Sredstva za novčane nagrade iz člana 3. stav 3. i 5. ove odluke obezbjeđuju se u općinskom budžetu.

#### **Član 21.**

Priznanje koje se dodjeljuje posmrtno, kao i ono koje nije uručeno za života, predaje se članovima uže porodice dobitnika priznanja.

#### **Član 22.**

Stručna služba Općinskog vijeća i Općinskog načelnika ustrojava i vodi evidenciju dobitnika priznanja.

#### **Član 23.**

Ova odluka stupa na snagu osmog dana od dana objavljivanja na općinskoj oglasnoj tabli, a objavit će se i u Informativnom biltenu općine Vareš.

**PREDSJEDAVAJUĆI  
OPĆINSKOG VIJEĆA**

**Josip Malbašić**

Ova odluka objavljena je na oglasnoj tabli Općine Vareš dana 30.03. 2012. godine.

**OPĆINSKI NAČELNIK**

**Hamdo Fatić**

## **O b r a z l o ž e n j e**

### **Odluke o općinskim priznanjima i postupku njihove dodjele**

#### **1. Pravni osnov**

Pravni osnov za donošenje ove odluke sadržan je u odredbi člana 13. stav 2. alineja 12. Zakona o principima lokalne samouprave u Federaciji Bosne i Hercegovine ("Službene novine F BiH", br. 49/06) prema kojoj općinska vijeća u okviru svojih nadležnosti donose odluke o nagradama i priznanjima jedinica lokalne samouprave.

U skladu sa članom 22. tačka 14. Statuta Općine Vareš, br. 01-25/09 od 29.01. 2009. godine i 01-15/12 od 30.01. 2012. godine, Općinsko vijeće donosi odluke o općinskim priznanjima i nagradama.

#### **2. Razlozi za donošenje**

Programom rada Općinskog vijeća Vareš za 2012. godinu, br. 01-239 /11 od 28.12. 2011. godine, u prvom kvartalu 2012. godine predviđeno je donošenje Odluke o općinskim priznanjima i postupku njihove dodjele.

Odredbom člana 2. Odluke o utvrđivanju Dana općine Vareš, br. 01-17/12 od 30.01. 2012. godine, propisano je da se povodom Dana općine dodjeljuju općinska priznanja, a članom 3. iste odluke propisano je da se općinska priznanja i postupak njihove dodjele uređuju posebnom odlukom Općinskog vijeća Vareš.

Stupanjem na snagu te odluke ispunjene su potrebne pretpostavke i za donošenje Odluke o općinskim priznanjima i postupku njihove dodjele. Njenim donošenjem popunit će se dosadašnja pravna praznina u ovoj oblasti.

#### **3. Finansijska sredstva**

U općinskom budžetu za 2012. godinu planirana su sredstva u iznosu od 5.000 KM za obilježavanje Dana općine Vareš.

Predlažem da Općinsko vijeće Vareš prihvati ovu odluku u predloženom tekstu.

PREDLAGAČ:  
**OPĆINSKI NAČELNIK**

**Hamdo Fatić**